

06. Juli 2020

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni, Namminersorlutik Oqartussat pilersitaannik, Namminersorlutik Oqartussat oqartussaaffigisaannik aningaasaqarnermik ingerlatsivinnik, soorlu aalisarnermut aningaaserviornissamik, kreditforeningiliornissamik, pensionskarsiliornissamik aammalu sillimmasiisarfiornissamik pitsaaqutaasussat akimmisaarutaasussallu pillugit Naalakkersuisut nalunaarusioq-qullugit peqquneqarnissaannik Inatsisartut aalajangiiffigisassaattut siunnersuut. Aallartitsine-rmi aningaasarsiornerup silarsuaani naatsersuutigineqartut, ass. pisortanit aallarnisarnermi aningaasaliissutaasussat aammalu sulisoqarnikkut pisariaqartinneqartussat nalunaarusiami pingaartillugit ilaatinneqassapput.

(Inatsisartunut ilaasorta, Henrik Fleischer, Siumut)

Tunngavilersuineq:

2017-imi Inatsisartut ukiaanerani ataatsimiinnermini immikkoortoq 135 akuersissutigaat, taamaattoq ajoraluartumik misissuinissamik siunniussaq 2018-imi qinersineq patsisaalluni piviusunngunngitsoorpoq.

“Siunnersuut uunga: Kalaallit Nunatta pigisaannik aningaaserviimmik pilersitsinerup iluaqutissartai aammalu aporfissarisinnaasaasa misissorneqarnissaannik, ilanngullugu pilersitsinerup suut piumasaaqatitariumaagai, soorlu aningaasartuutissat aammalu sulisussat pillugit Naalakkersuisut peqquneqassasut inatsisartut aalajangiiffigisassaattut siunnersuut”.

Suli isumaqarpunga pisariaqartinneqartoq uagut nammineq inuiaqatigiittut isigaluta aningaasaqarnikkut ingerlatsivinnik pilersitsissasugut, Nunatsinni atorfissaqartitsinerput aallaavigalugu pilersissallugit. Isumaqarluinnarpunga, nunatsinni aningaasaqarnikkut ingerlatsiviit kalaallinit namminerisamik pigineqartut aningaasaatitsinnik nunanut allanut inissittarnerannut killiliisnaasoq, aammalu tapersiissalluni aningaasanik kaaviartitaqarnerput sapinngisamik Nunatsinniiginnarnissaa siunertarissallugu. Nunatsinni najukkami kisaqqasumik aningaasatigut immikkuullarissumik namminerisatsinnik ingerlataqarnissarput isumaga malillugu aamma nunarput imminut napatilluni namminerisamik aningaasaqalernissaanut siuarsaanerussammat, aningaasaatitsinnik nunanut allanut annissuinersuaq killilersorneqalersinnaassammat.

Namminerisatsinnik aningaasaqarnikkut suliffeqarfinnik pigisaqannginnerput uanga paasinnittaasera naapertorlugu, ilimanarsiserujussuarpaa, aningaasat nunatsinniit annissorneqarnerat ima sukkatigisumik ingerlammata, allaat sermersuarmik iigartuaannartumik assersuunneqarsinnaalluni.

Tamanna pillugu pingaartilluinnarpara, nunatsinni aningaasanngorlugit naleqalersitavut, aningaasaatigut aamma maani iluanaarutaassasut, tamannalu pisinnaalluni namminerisatsinnik aningaaseriveqarnikkut aammalu taarsigassarsiniartarfeqalernikkut, taamaalilluni aningaasaativut maani nunatsinni sulilersinneqarsinnaammata.

Ullumikkut aqqissueriaaseq naapertorlugu taarsigassarsisarpugut nunani allani taarsigassarsiviit atorlugit, atukkavullu maanngaanniit akilersorneqarput, tassanilu assortuuttumik aningaasat annissorneqartut akileraarusiisarfitsinni naatsorneqarlutillu ilaatitaapput ilanngaatigineqarsinnaallutik nalikilliliisarnermut atorneqarlutik, taamaariarlutalu akilersuutivut nunanut allanut nassiuttarpavut, tassanerpiarlu oqartoqarsinnaavoq, nunatsinni aningaasaativut avaqqutaaraluta nunanut allanut annissorneqartut.

Isumaqarpunga piffissanngorsimasoq ersarissumik paasissallugu, kalaallit inuiaqatigiit sunik aningaasaatigut teknikiatigullu sunik periarfissaqarnersugut aningaasaqarnikkut suliffeqarfinnik pilersitsissagutta. Tassunga tunngatillugu pingaaruteqarpoq, sukumiisumik erseqqissassallugu, aningaasartuutigissamaakkat qanoq annertutiginissaat, taamaalilluni siunissami taamak pingaaruteqartigisumut ersarinnerpaamik tunngavilersugaalluurtumillu aalajangiisoqassappat, pitsaaqutit ajoqutillu tamaasa qulaajarluarlugit, taamalillutik Inatsisartut tunngavigissaartumik aalajangiinissaat angujumallugu. Tamattami aalajangeeriataapilunnermi kingunerisartakkat nalunngilagut. Neriuppunga Inatsisartut peqquteqarluartumik tapersersussagaat aalajangiiffigisassatut siunnersuutiga.

Pisortanut aningaasaqarnikkut allaffissornikkullu kingunerisassai

Nalilerneqarpoq nalunaarusiaq AC-ernik ukiumi ataatsimi arlalinnik pisariaqartitsinnaasoq. Aalajangiiffigisassatut siunnersuummut tunngasutigut ajornartorsiutit aammalu sukumiisumik misissuisoqarnissaa imaannaanngeqaaq, siunnersuut taamaattoq ersersinniartariaqarmagu inuiaqatigiinnut aningaasaqarnikkut tamakkiisumik kingunerisassai, ajunngitsortai aammalu ajoqutigisinnaasat tamaasa eqqarsaatigalugit. Ilanngullugu aamma pisariaqartinneqarpoq ersersinniassallugu suut nalorninarnersut, pisortat Nunatsinni taama annertutigisumik aningaasaqarnikkut akulerutissappata. Tamanna pissutigalugu ilimagineqarpoq, nalunaarusiornermi missingersuutigalugu allaffissornikkut AC-erit tallimat ukioq ilivitsoq atorneqassasut 500.000 kr. AC'eri ataatsimut. Aamma pisariaqarsinnaavoq immikkut paasisimasalinnik avataaniit tikisitsisoqartariaqartoq ilinniartinnilu qaffasinnerusuni sulisunik atuisoqartariaqarsinnaasoq. Immikkut ilisimasallit avataaniit aggersarneqassappata ilimanarsinnaavoq aningaasartuutigissamaakkat aningaasaatigut pilersaarutaareersut atuinnaarlugit ingerlanneqarsinnaasut, tamannami allaffissornikkut atorfissaqartitsinermeereemat.

Namminersortunut aningaasaqarnikkut allaffissornikkullu kingunerisassai

Soqanngilaq.

Innuttaasunut aningaasaqarnikkut allaffissornikkullu kingunerisassai

Soqanngilaq.